



22. juni 2021

Inatsisartut ingerlatsinermut maleruagassaasa § 37 imm. 1 tunngavigalugu Naalakkersuisunut ukuningga apeqquteqaateqarpunga:

Naalakkersuisunut apeqquteqaatit:

- 1. Illersornissamut ministereqarfiup nammineq piumassuseq aallaavigalugu sakkutuunngornissamik misiliinerit 2021-mi unitsikkallarnissaannut, kina akisussaasuaa?**
- 2. Danskit Illersornissamut ministeriat KNR-imut nalunaaruteqarami, Naalakkersuisut kissaatigisaat tunngavigalugu, nammineq piumassuseq aallaavigalugu sakkutuunngornissamik misiliinerit 2021-mi unitsikkallarneqassasut. Tamanna Naalakkersuisut kissaataanut naapertuuttumik akineqarpa?**

(Inatsisartunut ilaasortaq Anna Wangenheim, Demokraatit)

Tunngavilersuut

§ 37 tunngavigalugu apeqqummi 70-2021 ilaatigut nammineq piumassuseq tunngavigalugu sakkutuunngornissamik misilitsittarnermut ima apeqquteqarpunga.

Toqqaannartumik uku apeqquteqaatigaakka:

“Naalakkersuisut sakkutuunngorusuttunik pissarsiornerit Naalakkersuisut atorunnaarpaat?”

Tassunga Naalakkersuisut ersarissumik akissutigaa:

“Naalakkersuisut naalagaaffeqatigiinni oqartussanut tunngasunik aalajangersaanissaminut piginnaatitaaffeqanngillat, tassunga ilanngullugu Illersornissaqarfimmu.”

Naalakkersuisunit akissut taanna ataqatigiinngilluinnarpoq danskit illersornissamut ministeriata Trine Bramsen-mik issuarneqarneranit, KNR.gl-imi atuarneqarsinnaasumit:

“Naalakkersuisut kissaateqarnerat tunngavigalugu, Illersornissamut ministereqarfiup nammineq piumassuseq aallaavigalugu sakkutuunngornissamik misiliinerit 2021-mi unitsikkallarpai.”¹

Taamatut Danskit ministeriaqarfianit paasissutissiineq Naalakkersuisuniillu § 37-imi apeqquteqaatip akissutaani nr. 70-2021-imi paatsuunganarsinnaasoqarmat, Inatsisartut Inatsisaat Naalakkersuisunut ilaasortat akisussaanagerat aalajangersagaqarnera tunngavigalugu pingaaruteqarluinnarpoq Inatsisartunut innuttaasunullu eqqortumik paasissutissiinissaq. Taamaammatt paaserusunnarpoq Danskit ministeriaqarfiaat eqqortumik paasissutissiisimanersut immaqaluunniit paatsuunganartumik ilisimatitsinersut.

¹ <https://knr.gl/kl/nutaarsiassat/naalakkersuisut-sakkutuujusussaataitanermut-misilitsittarnerit-unitsikkaat>



Inatsisartut inatsisaat nr. 6, 13. maj 1993-imeersoq naalakkersuisunut ilaasortat akisussaanerat § 6 pillugu ersarilluinnartumik aalajangersagaq issualaariarlara:

§ 6. Naalakkersuisunut ilaasortaq § 10 naapertorlugu pineqaatissinneqassaaq piaaraluni imaluunniit mianersuaalliorujussuarnermigut Inatsisartut Naalakkersuisullu pillugit Inatsisartut inatsisaat inatsisilluunniit allat malillugit imaluunniit atorfimmi suunera malillugu imminut pisussaaf f igisassannortitaasut malillugit iliunngikkuni.

Imm. 2. Imm. 1-imi aalajangersagaq aamma atorneqartassaaq Naalakkersuisunut ilaasortaq eqqunngitsumik paasinerluutaasinnaasumilluunniit inatsisartunut paasissutissiisimappat imaluunniit inatsisartut oqaluuserisassamik oqaluuserinninneranni paasissutissanik oqaluuserisap inatsisartunit aalajangiiffigineqarnissaanut annertuumik pingaaruteqartunik nipangiussisimappat.”

Inatsit taanna § 37 tunngavigalugu apeqqutinut akissuteqarnermi soorunami aamma atuuppoq.

Apeqqutima ullut suliffiusut qulit iluanni akineqarnissaat kissaatigaara.